



23. maj 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit inatsisartut ataatsimiittarfissaat nutaaq pillugu:**

- 1. Aningaasat qanoq amerlatigisut ukiut tamaasa (2010-miilli) atorneqartarnikuuppat maannakkut Inatsisartut ataatsimiittarfiata aserfallattaaliorneranut iluarsaanneranullu?**
- 2. Aningaasat qanoq amerlatigisut Inatsisartut ataatsimiittarfiata maannakkut atorneqartup aserfallattaaliinissaanut iluarsaannissaanullu 2017-mi 2018-milu atorneqalersaarpat?**
- 3. Naalakkersuisut isumaqataanerlutik maannakkut Inatsisartut ataatsimiittarfiata iluarsaanissaa aserfallattaalinissaalu pisariaqartussaasut - aamma siunissami Inatsisartunit najorneqassanngikkaluaruniluunniit?**
- 4. Naalakkersuisut isumaqataanerlutik Inatsisartut ataatsimiittarfissaata nutaap iluarsaannissaanut aserfallattaalinissaanullu aningaasaliisoqartarnissaa aamma pisariaqartussaasoq?**
- 5. Aningaasaqarnermut Akileraarnermullu Naalakkersuisoq qanittukut Sermitsiaq.AG-mut imatut oqarpoq:**

*"Aningaasaqarnikkut inernerusut pitsaasut maannamit eqqissisimaarluta uningaannalernissatsinnik aningaasartuutillu aqunneqaratik qaffakkiartortinnissaannik pissutississanngilaatigut. Killormuanilli pingaaruteqarpoq, aalajangersimasumik siunnerfeqarluta ingerlaannarnissarput aningaasaqarnermillu sukangasuumik aqutsinissarput attatiinnassagipput. Aningaasartuutiniq nutaanik, aningaasaqarnikkut pissakinnerusunik kivitsinissamik kiisalu inuiaqatigiinni aningaasaqarnikkut naligiinnginnerup annikillissinnissaanik pingaarnertut anguniarneqassapput"*

**Naalakkersuisut isumaat naapertorlugu, qanoq ililluni Inatsisartut ataatsimiittarfissaata nutaap pissakinnerit iluaqusissavaat kiisalu inuiaqatigiinni aningaasaqarnikkut assigiinngissuseq millisillugu?**

(Inatsisartunut ilaasortaq Randi Vestergaard Evaldsen, Demokraatit)

### **Tunngavilersuut**

Naalakkersuisoqatigiit Inatsisartut ataatsimiittarfittaarnissaannut angusassamik toraagaqarpassilluinnarput naak innuttaasut akerliulluinnaraluartut. Illorsuaq sallaatsumik oqaatigalugu inuiaqatigiinnut milliuunilikkaat untritillit pingasut sinnerlugit akeqartussaavoq.

Aamma malunnarpoq Siumut IA-lu isumaqartut maannakkut ataatsimiittarfiusup aserfallattaalinissaanut nutarsaanissamullu aningaasartuutit ima ingasatsigisut allaat tunngavilersuutitut atorneqarsinnaasut nutaarsuarmik Inatsisartunut ataatsimiittarfiliornissamut.



Taamaattumik soqutiginarluinnarpoq paasissallugu aningaasat qanoq amerlatigisut iluarsaassinissamut aserfallattaaliinermullu atorneqartarnersut aamma taama soqutiginartigaaq paasissallugu eqqarsartoqarnersoq maannakkut ataatsimiittarfiusoq aseroriartortiinnarniarneqassasoq illorsuarmik nutaamik sanasoqassappat.

Qaavatigut aamma taama soqutiginartigaaq akissutissarsissallugu qanoq ililluni Inatsisartut ataatsimiittarfittaavat inuiaqatigiinni aningaasaqarnikkut assigiinnginnerujussuarmut iluaqusiissanersoq, Aningaasaqarnermut Akileraartarnermullu Naalakkersuisup Sermitsiaq.AG-mi ersarilluinnartumik oqarneratut.

***” Aningaasartuutinik nutaanik, aningaasaqarnikkut pissakinnerusunik kivitsinissamik kiisalu inuiaqatigiinni aningaasaqarnikkut naligiinnginnerup annikillisinnissaanik pingaarnertut anguniarneqassapput ”***

Inatsisartut ataatsimiittarfissaannut aningaasartuutit oqaatigineqartariaqarput aningaasartuutitut nutaatut.

Apeqqutit akeqquakka ullut suliffiit naliginnaasut qulit iluanni.